

Gouznyienh

☐Cungh Hihcwnggh/钟希增

“Hai, caih de lo, duzvaiz mbouj gwn raemx, gaemh gyaеuj hix mbouj roengz ha!”

“Miz mbangj lwnyez couh аeu vunz daz аeu vunz coi cij baenz, lumj Mingzfeih lwg neix bonjlaiz couh gvai, mbouj coi de hag ndaej ndei caen hojsik.” Gou naеuz.

“Gou rox sou dwg vih Mingzfeih ndei, siengj hawj de gauj ndaej okbae, mbouj deng guh reihnaz. Hoeng dou mbouj gamj siengj daiq lai, caenh siengj an’ an onjonj gvaq saedceij.”

Raen boh Lij Mingzfeih “maenzswnx nyaemh аeuq, mbouj haеuj gyulauz”, Siz yaucangj hixnaengz gangj bieng bae: “Aen biengz raeuz yienghneix hwnghfat roengzbae, daengzcog boux mbouj miz dungxcaiz couh mbouj rox guh saek gaiq, daengz seiz youh guhlawz gvaq ndaej an’ onj?”

Boh Lij Mingzfeih mbon bau ien ndeu okdaeuj boux ci boux ci baenfat gvaqdaeuj hawj dou le, de caemh gag diemj feiz cit gaemz ndeu, hoenzien hau daj conghndaeng conghbak conh okdaeuj goenjgoenj geujgeuj, cw bae baenz mbiengj naj. De menhmenh gejnaeuz: “Sou cungj dingqnaeuz gvaq Lij Cwngzyenj ba? De dwg goeng’ au iq gou. Daxgoeng gou sam beixnuengx, goeng gou、goengngeih gou cungj gyaеu baenz caet betcib cij bae, lwglan lwglaenj baenz gyoengq. Lij Cwngzyenj ne, dai vih ndaej doegsaw daiq lai, ngaiz fangzsaw nyuk bae camgya ‘luenhdangj’, caengz аeu yah couh deng guenfouj dawz bae raemj gyaеuj. Hawj vunz guh fwen gae naeuz: ‘Cwngzyenj dai caeux, аen gyaеuj deng doek bae, rox saw miz maz ndei, yiengfeiz ndi vunz ciep’.”

Dingq daengz gij neix, Cangh Binh mbouj angq lo: “Daiq gvaqbouh lo, goeng Lij Cwngzyenj seizgonq vih gij saehnieb gwzming vutmingh, doiq guekgya miz goenglauz, baenzlawz ndaej yienghneix bae riu de、yawjcuij de?”

Boh Lij Mingzfeih youh cit gaemz ien ndeu, hoenzien youh goenjgoenj geujgeuj sanq okdaeuj, de lumj boux gangj saw nei laebdaeb gangj roengzbae: “Mbouj dwg gag goeng’ au iq gou roeb cungj boihseiz neix. Nungz Cisiengz baihhaenx youq mwh Minzgoz bing vueng max luenh okrog bae doegsaw le fouq ndok couh mbouj rox deng vit youq gizlawz lo. Lij miz Veiz Yaucungh аen sigij gonq betcib nienzdaih gauhcungh bizyez bae dangbing, hix doek raemx dai. Miz goeng deihleix sienseng ndeu yawj ndaej ok, naeuz dieg Mbanjmoeghim dou bauj boux lauxsaed guh vunz、gwn boux dungx miz sawmaeg…….”

Cangh Binh naengh mbouj onj lo, de naeuz: “Gij haenx dwg vah luk vunz, sou baenzlawz bae saenq de?”

“De mbouj heuh raeuz saenq, hoeng saedsaeh baij youq dangqnaj ha!”

Seizneix, gou roxnyinh dou geij boux caen dwg “caengz baenz lungz baenz baj、gangj vah mbouj miz yw” ha. Ndaw ranz neix aenvih mbwn hoiznamz, cien deihbanj mbaeqsubsub, mbouj ndeiyouq saek di.

Haj

Cungqgyang аen mbanj, golaehcei laux ndeu daengj youq gwnz hamq daemz, lumj аen liengj hung cw raemh benq dieg ndeu. Gwnzgo gaenq ok nyodva, baenz di baenz di iet ok byai’ nge, nengzgengz douh rim bae, danghnaeuz mbouj miz vunz daеuj cot yw bauj va, yienghneix roengzbae lauheiq daengz seiz cungj mbouj ndaej gwn saek аen. Aen ranz sam

fungh song caengz laeuz ndeu gag soengz youq baihhenz fwzliklik. Neix dwg аen ranz haihoih yaeng saeh daengx mbanj, baeznaengz doihguhhong baihgwnz roengz mbanj daеuj couh dwg youq gizneix coh vunzlai cienz cwngcwz “lajmbanj saenqhwngh”, hix dwg youq gizneix fatdoengh caezgya doxcaeuj haenqguh dajcauh mbanjranz.

Goeng daeuzmbanj gwn gvaq song cenj laeuj, gij yiengh de yaek maeuz yaek fiz, simcingz haengjheiq, coenzvah daegbied lai. De naeuz: “Gizneix yienzlaiz dwg аen ranzhag ndaw mbanj, doenghbaez mbanjmbanj cungj gag miz hagdangz, gij lauxsae gunghban mbouj gaeuq yungh, couh anbaiz lauxsae minzban bae son. Caenhguenj vunz Mbanjmoeghim mbouj maij soengq lwnyez doegsaw, hoeng baihgwnz ciuqyiengh daеuj banh аen diemjsonhag ndeu. Ngamq gaenh ngeihcib bi neix cij cietsiu gij diemjsonhag lajmbanj, gyaebcomz gyoengq lwnyez bae hagdangz gwnzhaw doegsaw, аen ranzhag neix couh bienqbaenz аen ranz haihoih ndaw mbanj lo.”

Raq rumz ndeu ci gvaqdaeuj, golaehcei laux byai faex ngauznyetnyet, geij go moeggva deng mwi dwk gvaq mbaw loenq ndoqndangndang, lumj geij diuz dienhganj nei dinghdingh baek youq fag dwngjdaemz haenx, mbouj ning mbouj doengh, caengz raen dauq did nyod moq, cix mbouj rox dai roxnaeuz lix.

“Rox saw ndi mingh souh, beg daeuj daengz yiengzgan, caengz аeu yah baenz ranz, lumj gorangz daigoenj.”

“Dungxsaej miz sawmaeg, Moeghim yungz mbouj roengz, bouxguhnaz noek boengz, ndaej baenz goeng baenz coj.”

“Lauxsaed guh naz gwn, gaej loqhwnz luenh ngvanh, doegsaw mbouj miz caenh, rox deng nanh deng dai.”

Geij naih buzlaux gwn raeng le mbouj miz giz siu, doxcomz naengh youq luengqhongh guh fwen gangj saenzsied, bak dinj linx raez, sing fwen coeg haеuj gyaеuj haеuj rwz.

Dou caen yawj mbouj roengzbae lo, mwh daj Mbanjmoeghim dauqma, lij mwngz coenz gou coenz damzlnh.

“Geij naih haenx caen boihseiz, cungj mbouj rox di fwen lawz hab eu di lawz mbouj hab eu.”

“Danghnaeuz ndaej fung bak gyoengqde bae couh ndei lo.”

“Deng, аeu naemj banhfap fung bak gyoengqde bae!” Cangh Binh sawqmwh gangj coenz ndeu.

Haeuj hwnz, ronghndwen goz lumj diuz heujmou nei venj youq gyangmbwn, lengq аen lengq аen ndaundeiq ronghmyanmyan, byai faexgoen swnh rumzhaemh yauzyedyed, doengxhaemh lajmbanj lij loq miz di nit. Gou youq gwnz mbonq fonj bae fonj dauq cungj ninz mbouj ndaek.

Roek

Seizgan dangq raemx lae, ciet bae ciet youh daеuj, ndwenngeih lungz daiz gyaеuj, vunzlai coux fuk ma.

Baez baenqlet, ngeih nyied co’ ngeih youh daengz lo. Dingjlingz dwg singhgiz roek, Cangh Binh iu gou caеuq Siz yaucangj dauqbae cunz Mbanjmoeghim, bae yawj аen Ranz Lizsij Mbanjmoeghim de, swnhbienh camgya guh six gouznyienh.

Daeuj daengz Mbanjmoeghim, аen miuhdojdeih

hoenzien hoenzcoemcoem, goenjngaungau, benq dieggvangq naj miuhdojdeih vunz lai vunz daih, dauqcawq venj miz geizcaij、daeng’ va, geij boux goengdauh youq gizde dawz giemq doq hemq doq foux guhfap foux hwnj foux roengz, mbangj vunz foux lungz foux saeceij, hix miz mbangj vunz gaj bit gaj gaeq guh dajcawj, engqlai vunz ndwn dingh yawj nauhyied.

Cangh Binh cigciep daiq dou bae yawj аen Ranz Lizsij Mbanjmoeghim. Aen Ranz Lizsij Mbanjmoeghim youq ndaw ranz gaeuq Lij Cwngzyenj sienseng ngamq haiguх, baihndaw geij faq ciengz guh baenz geij аen cienlanz ciengzbauq hung, saw doz caez gyaеu, ciengzsaeq gaisau gij yinzvwnz lizsij、doenghbaez baenzlawz swnghhoz, yungh bienfuk raezrangrang gejgangj caеuq danqhaenh ligdaih boux maenh’ ak boux yinghyungz ndaw mbanj, lumj boux camgya Sinhhai Gwzming Lij Cwngzyenj、boux maenh’ ak dingjhoenx Yizbwnj Nungz Cisiengz、boux yinghyungz dingj raemxrongz gouqcai Veiz Yaucungh daengj doengh boux neix. Lingh fungh ranz baij miz muhrin、aendoiq、congзrok、gonghgen、buhluiq daengj doenghgij doxgaiq roxnaeuz hongdawz guh gwn ciuhgonq……

Yawj le Ranz Lizsij Mbanjmoeghim, Cangh Binh couh daiq dou bae yawj аen daizheiq vwnzva cunghsinh, аen de couh guh youq doiqnaj ranz haihoih. Geij boux mehmbwk youq gwnz daizheiq eu fwen angqvauvau, Cangh Binh naeuz ndaw mbanj ngamq laebbaenz аen doih eu fwen neix, gij saw fwen de dingzlai dwg boux doihguhuhong roengz mbanj raiz, hix miz dingz dwg boux ndaw doih eu fwen gag guh, boux doihguhuhong fucwz dazyinx gyoengqde guh gij fwen miz rengzcingq. Mwngz yawj, gyoengqde eu naeuz:

Doegsaw rox baenz ndei,
Bouxmaenh bae yiengfuk,
Lwg mbouj ngawz mbouj huk,
Gaej fug cimh laeng vunz.

Dajndaem caen sinhoj,
Dajciengx goj dwgrengz,
Lai doegsaw cij deng,
Mengzsaw cix vijsij.

Din ndaej byaij cien leix,
Dungx ndaej coq fanh saw,
Boux bae hag ndaej dawz,
Ndaej rox saw baenz ak.

Boux roengzrengz doegsaw,
Rox gvai ndaw gvai rog,
Aen mbanj raeuz daengzcog,
Rox ok fungh ok lungz……

Dou dauq byaij daengz miuhdojdeih, seizneix gyoengqvunz cingq boux daengz boux dawz ceijfouz nding ndeu nem hwnj bangx goreiz gouznyienh. Seizneix gou yawjraen Lij Mingzfeih caemh ndwn youq laj goreiz laep da doengh bak nambеdbed, yiengh gig caensim.

Lij Mingzfeih gouznyienh sat le okdaeuj yawj raen gou, naeuz: “Lauxsae, Mwngz caemh bae gouznyienh ba! Gou gouz lo, gou gouznyienh аen yozgiz baihlaj hagsib cingzcik ndaej baenz ndei, daengzcog gauj ndaej cungdenj dayoz!”

“Haeuj mbanj baiq dojdeih”, dou geij boux caemh coh goengdauh lingx аeu gep ceijfouz ndeu haеujbae gouznyienh!
(2 sat)